

## **MOCIÓN SOBRE O PROGRAMA MUNICIPAL DE CONCILIACIÓN.**

PLENO 22 FEBREIRO 2016. ACTA 0003/2016

Moción do grupo municipal AER presentada o día 20/01/2016 con número de rexistro 688 que di:

“Como ten acontecido nos últimos anos, o Concello fai público o Programa Municipal de Conciliación (“Nadal con Simona”), programa que se levou a cabo durante o Nadal do 2015, publicándose/dándose a coñecer o programa o venres 4 de decembro, e abríndose o período de inscrición o seguinte luns, día 7, ata o luns 14 de decembro.

A pesar de ser un programa que se realiza todos os anos, a actuación seguida polo grupo de goberno parece máis propia das présas e improvisación, na que se nota en falta previsión e organización no seu desenvolvemento.

Non é comprensible, nin admisible que sendo unha actividade que se realiza regularmente, non se proceda á súa publicación cunha antelación mínima dun mes para chegar ao coñecemento de todas as familias, tendo en conta que o criterio de admisión é única e exclusivamente “por rigorosa orde de entrada da ficha de inscrición no Rexistro Xeral do Concello”.

Dita falta de publicidade pode dar lugar a moitas conxecturas e inxustizas, porque o programa pode non chegar ao coñecemento das familias que realmente o necesitan.

Por outra banda, maniféstase na convocatoria que un dos obxectivos desta actividade é fomentar e favorecer a conciliación de responsabilidades familiares e laborais, pero pola contra, o criterio de admisión non é que os proxenitores dos menores traballen, senón que é por estrita orde de inscrición (pode darse o caso de que non traballen ningún dos proxenitores ou un só deles e sen embargo, accedan ao programa por presentar a inscrición no primeiro día).

Tamén se bota en falla que sendo unha actividade municipal, non se teña en conta como criterio de admisión a capacidade económica da unidade familiar, tendo en conta a limitación do número de prazas que se ofertan (posto que pode darse o caso de que una unidade familiar con máis ingresos pode chegar a acceder no sitio doutras de menores ingresos).

Resulta incomprensible que nestes momentos, nos que se fala e alardea da transparencia, se realicen programas que afectan á veciñanza con tan pouca publicidade; e que un programa cuxo obxectivo principal sexa conciliar vida familiar e laboral, non teña como o criterio prioritario de admisión a situación laboral e económica da unidade familiar.

Por todo o anteriormente exposto, a Agrupación de Electores de Redondela propón ao Pleno do Concello de Redondela os seguintes acordos:

1.- Que nos programas de conciliación laboral e familiar se establezan como criterios prioritarios de admisión a situación laboral e económica da unidade familiar.

2.- Que todos os programas de conciliación se publiquen cunha antelación de 1 mes antes da apertura do prazo de inscrición, publicidade que deberá realizarse como mínimo nos taboleiros de todos os centros educativos do Concello de Redondela e na páxina web do Concello de Redondela.

3.- Que os horarios sexan flexibles na hora de entrada dos cativos e cativas e que estes horarios abarquen o rango habitual do horario escolar para conseguir un encaixe real de cara a conciliación.

4.- Establecer un número de prazas para persoas con discapacidade proporcionado á demandas existentes deste tipo de prazas para evitar que queden fóra estes casos.”

*VOTACIÓN E ACORDO.-*

Instada a votación, resultan dez votos a favor (6 do PsdeG-PSOE e 4 de AER) e dez votos en contra (9 do PP e 1 do BNG).

Repítese a votación co mesmo resultado, polo que a moción resulta finalmente rexeitada polo voto en contra de calidade do alcalde.

O alcalde indica que se celebrará unha xuntanza o luns as 8,30 para tratar esta cuestión.